



STINAPA TA INFORMA

Si, pero di kiko..... dikon, na unda i ku ki regularidat?

Esaki ta kuater pregunta den un frase, laga nos kuminsá kontestá e preguntanan aki:

E kolumna ta forma parti di e kampaña di informashon tokante di naturalesa i medio ambiente ku STINAPA a kuminsá ku n'e e aña aki. E lema di e kampaña ta 'Nos ta biba di Naturalesa'. E grupo di enfoke ta tur esnan di entre 18 pa 70 aña di edat. STINAPA tin diferente partner den a kampaña aki, manera; gobièrnu, pueblo di Boneiru, sektor di turismo, komersio, gruponan di protekshon di naturalesa i medio ambiente i prensa.

Pa logra e meta di e kampaña lo usa diferente hèrmènt pa komuniká manera; korant, radio, televishon, lo parti 'sticker' pa pega riba outo i e korant Makubekèn lo sali kuater biaha pa aña ku tópikonan tokante di naturalesa i medio ambiente. Lo duna informashon amplio, na un manera positivo i lo motivá e pueblo pa partisipá na diferente manera den a kampaña.

E meta final di e kampaña ta ku denter di un tèrmino di 3 pa 5 aña e konosementu i aktitud di 70% di esnan den e grupo di enfoke lo ta di akuerdo ku e aspirashon pa un desaroyo duradero di Boneiru.

Pa por logra e meta final lo konsientisá tur esnan ku ta biba riba Boneiru di e balor ekonómiko ku naturalesa tin pa e isla. Lo informá di e diferente motibunan dikon mester anda ku kuidou ku naturalesa i lo splika di e daño ku lo por hasi na naturalesa i/òf na e medio ambiente si no anda ku kuidou. Daño ku por tin konsekuensia direktamente òf indirektamente pa e entrada finansiero di tur ku ta biba riba Boneiru i tambe pa e bestianan i matanan den nos naturalesa. Pa por logra e meta pueblo lo partisipá den e kampaña; lo hasi entrevista, públiko por hasi pregunta i instansianan por partisipá komo spònsèr den e kampaña.

E spònsèr mayó di e kampaña ta Wereld Natuur Fonds. Huntu ku nos, pueblo i e otro spònsèrnan, lo traha duru pa logra ku tur hende por komprende ku nos ta biba riba un isla úniko. Ku naturalesa ta nos produkto turístiko, ku e ta ofresé nos prosperidat i bienestar awe. Pero nos mester anda ku kuidou ku e produkto aki, pa asina mayan nos yunan tambe por saka probecho di dje.

Pa mas informashon i reakshon: STINAPA, telefón 717 - 8444, info@stinapa.org

NOS TA BIBA DI NATURALESAS



Traha huntu na un desaroyo duradero pa Boneiru